

Evening Dogri News Bulletin,

03 September 2024 18:15 Hrs

Headlines

- राष्ट्रपति द्रौपदी मुर्मू होरें आखेआ ऐ जे सब्बनें तालीमी इदारेणं गी लोडचदा जे ओहू बच्चिएं लेई पूरी चाल्ली सुरक्षित माहौल तैयार करन।
- प्रधानमंत्री नरेंद्र मोदी होर ब्रुनेई ते सिंगापुर दी जातरा दे पैहले मरहले च अज्ज दपैहरी बंदर सेरी बेगावन पुज्जी गे'न।
- विदेश मंत्री एस. जयशंकर होरें आखेआ ऐ जे एल्लै भारत ते सिंगापुर बश्कार रिश्ते गी अगले दर्जे तगर लेई जाने दा बनकदा समा ऐ।
- केंद्री मंत्रीमंडल नै प्रधानमंत्री आवास योजना गी होर 5एं बरें तगर बदाने दी मंजूरी देई दिती ऐ।

<><><><><><>

President-Education

राष्ट्रपति द्रौपदी मुर्मू होरें आखेआ ऐ जे सब्बनें तालीमी इदारेणं गी बच्चिएं लेई इक सुरक्षित माहौल यकीनी बनाना लोडचदा कीजे ओहू देसै दे विकास दा अनत्रुट्ट हिस्सा न। एहू गल्ल राष्ट्रपति मुर्मू होरें अज्ज पुणे च सिम्बिओसिस युनिवर्सिटी दे 21में दीक्षांत समारोह दे मौके पर आक्खी। उनें महिलाएं ते मर्दे बश्कार बरोबर पर जोर दिंदे होई आखेआ जे इस युनिवर्सिटी आस्सेया सामे ते पूरे पराते विकास लेई कीते गेदे हीले सराहनेजोग न। अनें आखेआ जे सुन्ने दा तगमा हासल करने आले 11 विद्यार्थिएं चा 8एं दा महिला होना युनिवर्सिटी आस्सेया इत्त भेठा कीते गेदे जत्तें गी दर्शादा ऐ।

<><><><><><>

LG-Students

उपराज्यपाल मनोज सिन्हा होरें कल बक्ख-बक्ख राज्यें ते केंद्र शासित प्रदेशें थमां कश्मीर सम्वाद यात्रा दे इक हिस्से दे तौरा पर जम्मू-कश्मीर दे सांस्कृतिक अध्ययन दौरे उप्पर आए दे विद्यार्थिएं कन्नै मलाटी कीती।

श्रीनगर दे राजभवन च विद्यार्थियों कन्नै गल्लबात करदे होई उपराज्यपाल होरें अखंडता च एकता दी भावना ते भाईचारे दे मूल्यें गी बढावा देने च आदान-प्रदान कार्यक्रमें दे महत्व उप्पर लोऽ पाई। एलजी होरें विद्यार्थियों गी हर अवसर थमां किश न किश सिक्खने ते राष्ट्र निर्माण दे कम्म च योगदान देने लेई गलाया। दौरे उप्पर आए दे विद्यार्थियों जम्मू-कश्मीर दे अपने यादगार दौरे बारै विचार सांझे कीते।

<><><><><><>

PM-Visit

प्रधानमंत्री नरेंद्र मोदी ब्रुनेई ते सिंगपुर दी अपनी जात्तरा दे पैहले मरहले च अज्ज ब्रुनेई दे बंदर सेरी बेगवान पुज्जे। ब्रुनेई अंतरराष्ट्री ब्हाई अड्डे पर उत्थूं दे युवराज हाजी अल मुहतादी बिल्लाह नै उंदा सुआगत कीता। कुसै भारतीय प्रधानमंत्री दी ब्रुनेई दी एहू पैहली जात्तरा ऐ। मोदी हुंदी एहू जात्तरा भारत ते ब्रुनेई बश्कार राजनयिक सरबंधें दी 40मीं बरे गंड दे सिलसिले च होआ रदी ऐ। एहूदे शा पैहले अज्ज बडुलै नमीं दिल्ली थमां खाना होने कोला पैहले प्रधानमंत्री नरेंद्र मोदी होरें इस गल्लै दा भरोसा जताया जे उंदी इस जात्तरा कन्नै दौनें मुल्लखें ते आसियान मुल्लखें कन्नै भारत दे सरबंध ते सांझ भ्याली होर निगगर होग। उनें आखेआ जे दवै मुल्लख भारत दी एकट ईस्ट पालसी ते इंडो पैसिफिक आले नजरिए दे महत्वपूर्ण भ्याल न। मोदी होरें आखेआ कीजे भारत ते ब्रुनेई अपने राजनयिक सरबंधें दी 40मीं बरे गंड मना करदे न, इस लेई ओहू सुल्तान हाजी हसनल बोल किया ते शाही परिवार दे होरनें मानजोग सदस्यें कन्नै मलाटी लेई बेसब्री कन्ने बलगा रदे न।

<><><><><><>

Cabinet-Security

केन्द्रीय मंत्रिमंडल दी सुरक्षा मामले दी समिति नै भारतीय वायु सेना दे एसयू-30 एमकेआई जहाजें आस्तै 240 एयरो इंजनें दी खरीद दे प्रस्ताहू गी मंजूरी देई दिती ऐ। इस मसौदे गी हिंदुस्तान एयरोनाटिक्स लिमिटेड थमां सब्बने करें समेत 26 ज्हार करोड़ रुपें दी लागत भारतीय सूचि च बाय इंडियन श्रेणी च मंजूरी दिती गेई ऐ। रक्षा मंत्रालय ने आखेआ ऐ जे इनें एयरो इंजनें गी सोंपने दा कम्म 1 बरे मगरा शुरू होग ते इसी 8एं बरें च पूरा करी

लैता जाग। एह इंजन 54 फीसद स्वदेशी सामग्री कन्नै बने दे न ते इंदा निर्माण हिंदुस्तान एयरोनाटिक्स लिमिटेड दे कोरापुट प्रभाग च कीता जाग।

<><><><><><>

CS-Skill APP

मुख सचिव अटल डुल्लू होरें कल श्रीनगर दे सिविल सचिवालय च इक बैठक दी अध्यक्षता करदे होई युवा कौशल ते उद्यमता ऐप दी समीक्षा कीती। बैठक दौरान इस ऐप दिएं बक्ख-बक्ख विशेषताएं गी उजागर कीता गेआ ते एहदी विकास प्रक्रिया ते एहदे च आंदी जा रदी बेहतरी ते सुधारें बारै तफसीली जानकारी सांझी कीती गेई। मुख सचिव होरें जोर देइए आखेआ जे इस ऐप दिएं विशेषताएं ते गुणें गी भलेयां अज्जै-कल्लै दे समें दिएं जरूरतें स्हाबै तैयार ते विकसित कीता जाना लोडचदा। उनें आखेआ जे इस ऐप च युवा कौशल ते उद्यमता दे क्षेत्र च उपलब्ध मौकें ते संभावनाएं दी पूरी-पूरी जानकारी होनी लोडचदी।

<><><><><><>

Ek Ped Maa Ke Naam

एक पेड़ मां के नाम अभियान तैहत मुख दे बक्ख-बक्ख हिस्सें च अजें तोड़ी 52 करोड़ कोला मते बूहटे पौधे लाए जाई चुके दे न। इक सोशल मीडिया पोस्ट च पर्यावरण, जंगलात ते जलवायु परिवर्तन मंत्री भूपेंद्र यादव होरें आखेआ ऐ जे एह अभियान इक्क होर मील दा पत्थर साबत होआ ऐ। विश्व पर्यावरण दिवस दे मौके पर प्रधानमंत्री होरें इस अभियान दी शुरूआत कीती ही ते हर कुसै गी अपनी मां प्रति सम्मान प्रगट करदे होई इक्क बूहआ लाने दा आह्वान कीता हा।

<><><><><><>

Rahul-Campaign

लोकसभा च विपक्ष दे नेता राहुल गांधी होर कल रामबन ते अनंतनाग जिले च जन सभाएं गी संबोधित करियै औंदे जम्मू-कश्मीर दे असैम्बली चुनाएं लेई कांग्रेस दे प्रचार अभियान दी शुरूआत करडन। औंदी 18 सितंबर गी असैम्बली चुनायें दे पैहले गेढ लेई चुनां मैदान च खडोते दे मेदवार दे हक्का च एह रैलियां कीतियां

जाडन। राहुल गांधी हुंदे अलावा कांग्रेस प्रमुख मल्लिकार्जुन खडगे, सोनिया गांधी ते पियंका गांधी हुंदे सने होर दुए 40 प्रमुख प्रचारक औंदे असैम्बली चुनाएं दे त्रोनें मरहलें च चुना प्रचार करडन। जम्मू-कश्मीर च असैम्बली चुनाएं लेई औंदी 18 ते 25 सितंबर ते 1 अक्तूबर गी वोट पाए जाडन।

<><><><><><>

Jaishankar-Singapore

विदेश मंत्री डॉ. एस जयशंकर होरें आखेआ ऐ कि भारत ते सिंगापुर दे दपक्खी सरबंधें गी अगले दर्जे तोड़ी लेई जाने दा समा आई गेदा ऐ। प्रधानमंत्री नरेंद्र मोदी हुंदी सिंगापुर जातरा कोला पैहले इक इंटरव्यू च डॉ. जयशंकर होरें आखेआ जे दौनें मुखें दे सरबंध पिछले दऊं दहाकें थमां मते निग्गर रेय ना। विदेश मंत्री होरें आखेआ जे दपक्खी सरबंधें दे अलावा मजूदा समें दे इक्क “अस्थिर ते यक्कोतक्की” आले कुल संसारी माहौल च दौनें मुखें बश्कार बड़ा मता नेडमा सहयोग बने दा रेया ऐ। उनें आखेआ जे भारत ते सिंगापुर दौनें दा मनना ऐ जे इंदे आपूं च दे सरबंध इक दुएं पर साह भरोसे ते आपसी समझ पर टिकी दी इक सांझेदारी ऐ। तोआई सिंगापुर च भारतीय उच्चायुक्त डॉ. शिल्पक अंबुले होरें आखेआ जे भारत ते सिंगापुर नमें उभरदे क्षेत्रें गी बढ़ावा देने लेई सरबंधें गी होर तगड़ा बना करदे ना।

<><><><><><>

Labour-PMAY

श्रम ते रोजगार मंत्रालय नै प्रधानमंत्री आवास योजना दे लाहू वंचित कम्मगारें गी देने, इसी होर अगगे बदाने दा फैसला कीता ऐ। इस सरबंध च मंत्रालय नै सब्बनें राज्य सरकार गी पत्र जारी कीता ऐ जेदे च प्रवासी मजदूरें, ईमारतें दा निर्माण करने आहले मजदूरें सने गैर कोयला खदान मजूरें ते होर दुए असंगठित श्रमिकें गी शामिल करने दा आग्रह कीता ऐ। एहू निर्णय केंद्री मंत्रीमंडल आस्सेया प्रधानमंत्री आवास योजना दे अमल आवरी गी माली बरे 2024-25 थमां 2028-29 तगर बाद्दे 5 बरे लेई बदाने दी मंजूरी दे मद्देनजर लैता गेआ ऐ। एहदा उद्देश्य योग्य लाभार्थियें गी दो करोड़ बाद्दू घर उपलब्ध कराना ऐ। एहू पैहलकदमी आर्थिक तौरा उप्पर कमजोर मजदूरें गी आवास दी सुविधा देने च मदाद दिंदी ऐ।



Archer Sheetal Devi

पैरा ओलंपिक्स 2024 च भारतीय खड्डारी शीतल देवी ते राकेश कुमार होरें मिक्स्ट टीम काम्पाउंड तीरंदाजी मुकाबले च कैहू दे तगमे हासिल कीते न। एसियन पैरा खेड्डें दी गोल्ड मेडलिस्ट ते अर्जुन अर्वाडी तीरंदाज शीतल देवी भारत दी मन्त्री परमन्त्री दी खड्डारन न। 17 बरें दी शीतल देवी जम्मू खितते दी बसनीक न। ओहू विश्व दियां पैहली महिला तीरंदाज न जेडी बिना बामें दे सटीक निशाना लांदियां न। उनेंगी 2023 च राष्ट्रपति द्रौपदी मुर्मू होरें अर्जुन पुरस्कार कन्नै सम्मानित कीता हा। शीतल देवी होर 15 बरे तगर तीर कमान नेई हा दिक्खेआ पर छडे चकुं म्हीनें दी सिखलाई परेंत उनें तीरंदाजी च महारत हासल करी लेई। पैरिस च चला रदे पैरालंपिक्स च बी उनें शानदार प्रदर्शन कीता ते करोडें लोकें दा मन मोई लैता।



PM-Nitya

प्रधानमंत्री नरेंद्र मोदी होरें नित्या श्री सिवन होरें गी पेरिस पैरालंपिक च महिलाएं दे इक्कलै बैडमिंटन SH-6 मुकाबले च कैहू दा तगमा जित्तने दी बदाई दिती ऐ। इक सोशल मीडिया पोस्ट च मोदी होरें सिवन हुंदी सराहना कीती ते आखेआ जे उंदी एहू सफलता हर इक माहनू गी प्रेरित करोग। उनें गलाया जे उंदी एहू उपलब्धि खेड्डू प्रति उंदी कड़ी मेहनत गी दर्शादा ऐ।



SVEEP-Udh.

लोकें गी मतदान दे महत्व बारै जानकार करने ते वोट पाने लेई उंदा दिल बदाने दे मकसद कन्नै उधमपुर जिले च स्वीप कार्यक्रम तैहत इक साइकल रैली दा सरिस्ता कीता गेआ। जिला चुनां अधिकारी सलोनी राय होरें इस साइकिल रैली गी बडुलै डी.सी दफ्तर थमां झंडी दस्सियै रवाना कीता। इस मौके उप्पर बोलदे होई सलोनी राय होरें आखेआ।



SVEEP-Rafting Reasi

मतदाताएं गी जागरूक करने ते चुनाएं च उंदी हिस्सेदारी गी बदाने दे मकसद कन्नै रियासी दे जिला चुना अधिकारी विशेष महाजन हुंदी रहनुमाई च स्वीप कार्जक्रम दे इक्क हिस्से दे तौरा पर राफिंटंग दा सरिस्ता कीता गेआ। इस कार्जक्रम दा मकसद नौजोआनें कन्नै जुडियै उनेंगी चुनाएं च मतदान लेई प्रेरित करना हा। डीईओ विशेष महाजन होरें हरेक वोट दे महत्व गी दोहराया ते नौजोआनें गी अपने लोकतांत्रिक हक दा जिम्मेदारी कन्नै इस्तेमाल करने दी अपील कीती। उनें गलाया जे इस चाल्ली दे कार्जक्रम ना शडा वोटरें गी जागरूक बनांदे न सगुआं हिस्सा लैने आहलें च दलेरी ते आपसी भाईचारे दी भावना गी बी बदांदे न।

<><><><><><>

SVEEP-Reasi

मतदाताएं गी जागरूक करने ते चुनाएं च उंदी हिस्सेदारी गी बदाने दे मकसद कन्नै रियासी जिले दे अरनास इलाके च स्वीप कार्जक्रम दे इक हिस्से दे तौरा पर नौजवानें लेई जागरूकता प्रोग्राम दा सरिस्ता कीता गेआ। इस प्रोग्राम च विद्यार्थिएं ते प्रोफेसरें हिस्सा लैता। नोडल अधिकारी सचिन शर्मा हुंदी अगुवाई च स्वीप टीम नै कार्जक्रम दौरान नौजवानें गी 25 सितंबर गी वोट पाने लेई प्रोत्साहित कीता। उनें आखेआ।

<><><><><><>